

冷

廬

雜

識

冷廬雜識卷八目錄

奔走

名字沿誤

芋

三墳五典

晁具茨詩

文終文質

古今人表

藥詩

二母知人

馬

李德裕張平敬

擬旨

荀崧女

翔字

鳩槃茶

獨寢不慙於魂

四字異體

楊修劉顯

烏程三相國

孔子弟子考

久任

名號諡

田田錢錢

謄錄

作者七人矣

揚无咎

鄉會試題

奇名

宋猶山詩

李鶴杉

遷居詩

父子能詩

多石公詩話

徐鶴舟

王曉菴

一綫天題辭

道情

場屋中忌諱字

土物

兩世秋元

竹夫人

像

西征日記

恩科

袁隨園

志學箴

麗辭

高文端公

婦人悼亡詩

油汗衣方

朱相國

勞孝廉

岳忠武王忠肅

詹生姪詩

給燭

徐觀察

錦囊集

難經經釋

董祐堯

任子不齊

晉唐文章

聰訓齋語

陶宏景

除夜詩

五律句用仄聲

王微之

黃綰

桑水部詩

張浚

仞

市

邱大理

詠菊

鄭中丞詩

韓文公闕佛

嵇叔夜

芭蕉樹

泉甘而酒冽

陳士奇

鄧侯

作文增益

殉葬

朱侍郎詩

採芳集

三元

蜜丁馬甲

七上黃鶴樓散人

良心官

自鋤明月種梅花

朱文正公詩

兄弟同登科

孔太恭人

譚滌生詩

黃韻珊詞

垂訓樸語

卓倚兀

先生

來歙傳

終篇用也字

貪生倖福

呂氏春秋

王穀塍

陳樸堂詩

徐敬齋明經

顧媚柳是

蘅昀公撰聯

歷代甲子紀元表

靜宜女史詩

甲癸議

孔宥函司馬

三石公聯

壽序

犬門

家傳單方

江忠烈公

太錢

姚梅伯詞

笙鶴樓

陳參議

周遇吉

赤水元珠

赤城雜詩

小琅玕山館詩



冷廬雜識卷八

桐鄉 陸以湜 敬安

奔走

詩予曰有奔奏傳箋之義各不相合正義乃強合之既以奏爲宣布之義又以奔走之義屬之其說難通傳以爲喻德宣義於奏之義則當矣而奔字難通惟箋以歸趨爲義其說最協蓋奏走古本相通也

名字沿誤

漢司徒王況或誤作王當作王音宿王巾字簡柄作頭

陀寺碑巾當作巾唐倪若冰或誤作水當作冰宋米元章名芾或誤書芾从巾巾當作芾从一巾說文作市古韍字雁湖居士李壁宋史誤从玉當从土作壁趙與峯宋史誤作裕當作窶元康里攪攪元史誤作攪讀若夔當作攪讀若猱又鮑照不當作昭謝朓不當作眺此類尙多

芋

芋在處皆有而蜀地尤美王子淵僅約凡四言芋曰養芋曰發芋曰雁芋曰香芋蓋物土所宜言之不厭其詳

也

三墳五典

三皇五帝之書春秋時尙存三墳五典是也秦以後無傳傳者乃僞耳嬴政之燬酷矣哉

晁具茨詩

五言詩於第一字第三字讀斷七言詩於第一字第三字第五字讀斷晁具茨沖之集中恆用此體如四海皆行路吾何必此途乃第一字讀斷也五十年昇平一迷都驅萬騎出關西金鏐蹀微鳴躡影錦連錢不動追風

老去幽棲誰比數傳君詩一邑人驚乃第三字讀斷也  
出郭借人乘豈肯自誇騎入大明宮借有三千兩鍾石  
定無八百石胡椒乃第五字讀斷也

文終文質

論以文稱者至多而論文終者惟漢蕭何論文質者惟  
宋羅從彥宋錢惟演初論合敏而好學貪以敗官二法  
謚曰文墨二字亦史冊罕見

古今人表

漢書古今人表後人多以疎舛訾之惟錢氏大昕謂其

列孔子於上聖顏閔子思孟荀於大賢孔氏弟子列上等者三十餘人而老墨莊列諸家降居中等孔氏譜系具列表中儼然以統緒屬之其敘次九等祖述仲尼之言論語二十篇中人物悉著於表而他書則有去取後儒尊信論語其端實啟於此梁氏玉繩復爲之攷且謂別於九品確當爲難毫釐之差誠所不免而屢經傳寫紊脫尤多非盡班氏之咎按人表自三皇迄秦聖智賢愚凡二千百十三人後世藉以考驗得失可爲法戒之資唐韓佑仿之作續古今人表十卷惜不傳顧氏棟高

作春秋人物表分賢聖純臣忠臣功臣獨行文學辭令  
佞臣讒臣賊臣亂臣俠勇方技十三等又列女表分節  
行明哲縱恣不度三等品核較精然採列未備觀人表  
體例有殊修史者誠能循班氏之軌辨析九等代繫以  
表俾一朝淑慝之分犁然顯著不有裨於勸懲之道歟

藥詩

晁公武郡齋讀書志云陳亞之喜賦藥名詩藥詩者始  
於唐人張籍有江皐歲暮相逢地黃葉霜前半下枝之  
詩人謂起於亞之實不然也余按梁簡文帝集中有藥

名詩如燭映合歡被帷飄蘇合香石墨聊書賦鈇華試作粧等句是藥詩亦不始於張籍矣

### 二母知人

王珪隱居時與房元齡杜如晦善母李嘗曰而必貴然未知所與游何如人會元齡等過其家李窺大驚救具酒食歡盡日喜曰二客公輔才汝貴不疑潘孟陽母劉晏之女初孟陽爲戶部侍郎劉憂日以爾人材而在丞郎之位吾懼禍之必至也試會爾列吾觀之因徧招深熟者客至劉視之喜曰皆爾儔也不足憂矣向末座慘

緣少年何人也曰補闕杜黃裳劉曰此人全別必是有  
名卿相二府知人一信之於未達之前一察之於既顯  
之後其識鑒皆不可及

馬

十二生肖中兔蛇猴皆不人卦象凡言虎之卦三履頤

而說卦不及焉言馬者八卦坤屯賁大畜而說卦取象

且有三卦乾震坎知馬之爲用廣矣

李德裕張孚敬

李德裕以蔭人官乃抑進士科張孚敬登第在部觀政



迨議大禮擢學士諸翰林不與並列後乃盡黜翰林官  
視古大臣忘私進賢盡迴殊矣

### 擬旨

明仁宗時夏忠靖公原吉擬旨多云某部知道或以問  
公公曰予奪之柄非臣下所敢專故付之六部定其可  
否而復取上裁則事有所分而權不下移旨哉言乎宜  
至今因之不改也

### 荀崧女

荀崧爲襄城太守爲杜曾所圍力弱食盡崧小女灌年

十三卒勇士數十人踰城突圍夜出詣平南將軍石覽  
乞師又爲崧書與南中郎將周訪請援訪遣子撫率三  
千兵會石覽俱救崧賊聞兵至散走灌之力也奇節如  
此紀載罕有惜晉書僅誌此一事而不詳述其生平

### 翊字

丹鉛總錄謂後周皇后服制受爾則服鷩衣聽女教則  
服鷩衣歸甯則服翊衣鷩鷩字惟見此蓋蘇綽所制也  
余考翊字字書不載而鷩字則見於爾雅釋鳥云雉  
鷩雉註今白鷩也江東呼白雉亦名白雉宜云翊字惟

見此乃合

鳩槃茶

太平廣記大爲婦吹火詩吹火青唇斂添薪黑腕斜遙  
看煙裏面恰似鳩槃茶鳩槃茶乃佛經語或作拘躡茶  
究槃茶恭畔茶弓槃茶皆一也言變形似冬瓜也以是  
爲喻狀其容之醜也前乎此者莊子有之云甕瓮大癩  
獨寢不慙於魂

劉勰新論獨立不慙影獨寢不愧衾蓋本晏子春秋獨  
立不慙於影獨寢不慙於魂魂字實勝衾字

四字異體

四字異體而音義皆同者惟麤粗犷麤麤古麤俗粗犷通用

楊修劉顯

魏武題活字於門楊修知其嫌門潤又題合字於酪杯蓋頭楊修知爲人一口梁武署沙門訟田者曰貞而劉顯知爲與上人二子之才雋矣然卒爲所忌聰明何可恃乎

烏程三相國

明季烏程有三相國所居相距不過九里時有九里三  
閣老之謠朱文肅公國楨倡均徭之議東南大水又請  
改折德澤及人鄉邦推重沈潛結納客魏溫體仁奸私  
誤國間里差稱之三人皆載明史而府縣志列傳獨詳  
文肅事實沈溫則諱而不書肆志一時輿名千載嗚呼  
此亦足以爲鑒戒也

孔子弟子考

朱竹垞太史孔子弟子考謂歐陽子有言受業者爲弟  
子受業於弟子者爲門人試稽之論語所云門人皆受

業於弟子者也顏淵死門人厚葬之此顏子之弟子也  
子出門人問此曾子之弟子也子疾病子路使門人爲  
臣又門人不敬子路此子路之弟子也子夏之門人問  
交於子張此子夏之弟子也孟子曰門人治任將歸入  
揖於子貢此子貢之弟子也云云然余觀論語童子見  
門人惑此當爲孔子之弟子不得謂是孔子弟子之弟  
子也子游曰子夏之門人小子此當爲子夏之弟子不  
得謂是子夏弟子之弟子也孟子門人問曰夫子何以  
知其將見殺此當是孟子之弟子不得謂是孟子弟子

之弟子也以此證之朱之說豈其然乎

久任

牧民官必使久於其任而後與民相習得以盡撫綏之略明興百餘年間澄敘官方勤求上理居職最久者如趙登知湖州府自宣德至正統十七年劉綱知甯州自建文二年進士官府谷知縣遷擢在甯州三十四年吳祥知嵩縣自永樂至宣德三十二年中葉以後此風漸渺吏治亦不如前矣

名號證

堯舜禹稱名湯稱號文王武王稱諡由質而文卽此亦可觀世運

田田錢錢

女子雙名最多獨辛稼軒妾田田錢錢因其姓而名之與其他雙名者異

膽錄

浙人鄉試每以金貽膽錄手之善書者潛遞關節屬其膽卷硃色鮮明字畫光整易動閱者之目亦有已獲科名者貪得厚利冒應是役甚至私攜墨筆點竄試文中



簡則可得重酬此風始自紹興人沿及諸郡道光丙午  
秋試士子一萬一千餘人其不購謄錄者祇三千餘卷  
僅得售三人蓋以字迹潦草校文者以辨識爲苦輒屏  
棄不觀也猶憶壬辰榜後謁見房師樂平齊星舟先生  
雙進嘉慶丙子舉人官終石門縣知縣先生謂汝文佳而字體模糊耗  
我半夜心力始能辨晰尤賴主司愛才取墨卷校對方  
得入彀爾時購謄錄者未多而弊已若此幸遇樂平山  
陽天津三先生不致擯棄知己之感畢世勿諼也

作者七人矣

作者七人矣王氏謂伯夷叔齊虞仲夷逸朱張柳下惠少連包氏謂荷蕢荷蓑儀封人晨門楚狂接輿長沮桀溺程伊川又謂作者之謂聖義農黃帝堯舜禹湯是也袁俊翁四書疑節則謂專指當時而言宜主包氏之說特封人本以得時行道爲心初不與彼六人同行當以微生畝易之此說剝而實確

### 揚元咎

楊姓皆从木惟宋清江揚元咎祖漢子雲从才不从木二千年來典籍中不多見也

鄉會試題

鄉會試題首題論語則次題爲中庸首題大學則次題爲論語三題孟子此定例也道光庚子科山西首題德潤身心廣體胖次題體羣臣也子庶民也以無論語題主試皆獲譴吾浙鄉試出大學題闈中必有火災故老相傳康熙初三次皆然康熙癸卯首題生財有大道一節王子首題如切如磋六句庚午首題無所不用其極自是以後浙闈不復出大學題蓋沿以爲例矣

奇名

明番禺羅賓王官南昌府同知罷歸築哭斯堂於里門  
此堂名之最奇者吾邑馮舉博嗣京取少壯不努力老  
大徒傷悲之意築別業曰大悲菴此菴名之最奇者朱  
竹君學士視閩學時令士子人采一石築亭署中供之  
各鐫姓氏於上顏曰三百三十三士亭此亭名之最奇  
者洪洞范端所著雜文名草草草此書名之最奇者

### 宋物山詩

宋物山大令乾隆戊申孝廉中歲宰扶風七載卽挂冠  
歸著有紅杏軒詩鈔其宰扶風時案牘之暇不廢吟詠

所賦小遊仙詩有云本是瑤池會上仙浣紗小謫玉河  
邊自言愛女佳期近又索黃姑助嫁錢暫插朝天白玉  
簪歸來依舊擣雙砧七襄任汝纖纖手爭奈銀河負債  
深甫報瑤池桂樹秋武皇又作絳河游上清畢竟論門  
第怪道登仙總姓劉漠漠春陰淡淡煙揚州未到早腰  
纏早知駕鶴飛昇易悔讀黃庭五十年盡皆有爲而作  
斷句如陳思王墓云姦人有後天難問才子封王禍未  
慳虎邱云廡下千秋高士少水邊二月蠶人多亦研鍾  
入妙

李鶴杉

李鶴杉學博博聞強識才藻富有小試以長鬣呼餘皇  
賦受知於學使李芝齡師入邑庠第一人稱爲李長鬣  
道光甲午闕作爲副主試歙縣徐廉峯太史寶善所賞  
而正主試以次藝犯下黜之

發強剛毅足以有執也題文用血氣二字旋於

乙未獲售入都太史招之往使在弟子之列李獻詩有  
名傾元叔登朝日恩感昌黎薦士年之句寓都門得詩  
盈篋編爲北行草其贈端木鶴田舍人一律最佳詩云  
歲星遊戲往人間車馬盈門自閉關一架藤花留散吏

舍人寓寄園  
紫藤精舍

十年徽省話清班

海隅應詔恩原渥日

下讎書老未閒料得韋編三絕後

舍人著易指已刊

等身事業

付名山

### 遷居詩

舒鐵雲孝廉寓居吾里鄉思橋偶與友人書云比張融  
之居建業彼尙多此一舟若相如之返成都我并無其  
四壁沈青齋觀察見之卽以南花橋老屋借居且寓書  
曰但住無妨且行弗顧所望泥金之捷先賁蓬門耳舒  
因賦詩以謝有云南花橋頭秋水綠扁舟願寫移居圖

移居之圖尙可寫羌此高義今則無時乾隆甲寅歲也  
父子能詩

宋浦城詹應之慥詹元善體仁父子能詩厲樊榭宋詩  
紀事皆遺之應之寄胡籍溪詩云雨過溪頭鳥篆沙溪  
山深處野人家門前桃李都飛盡又見春光到棟花春  
懷示鄰里句云斷牆著雨蝸成字老屋無聲燕作家元  
善幽居詩云投老安閒世味疏深深水竹葺幽居牀頭  
昨夜風吹落多是經年未報書風致俱妙

三石公詩話



先伯父少石公詩話謂吳穀人祭酒深於友誼少與沈  
臞菴交最篤臞菴病劇適自嚴江歸急往視之但及一  
執手而已因哭之以詩云我作孤游君獨愁獨愁春去  
又成秋半年愴我方歸棹一病聞君已臥樓舊事可憐  
如夢過輕帆幸不被風留只爭片刻猶相見得見能教  
不淚流清空一氣讀之悽惋今觀全集中所刊已皆改  
易云無限淒涼對素琴曾於賤子託知音友朋實有家  
人意風雨甯渝生死心獨立無端斜照冷此情千古大  
江深但逢峯歎泉吟處認爾魂歸楓樹林氣格雖較莊

重然轉迺前作之真摯竝錄之以質精於斯道者

徐鶴舟

同里徐鶴舟布衣石麟籍隸烏程少孤而貧訓蒙自給  
程筠軒茂才倡梅魂詩索和於人徐作爲所賞以女字  
之未娶得痿疾乃更刻苦爲詩病三十載忽起程方將  
送女畢姻而徐竟以傷暑暴卒其從姪春鄰爲刻遺稿  
以行世其梅魂詩云仙姿縹緲總無形歸去羅浮與洞  
庭玉笛吹殘空自怨瑤琴撫罷遣誰聽雪寒孤月村邊  
白煙冷數峯江上青欲覓芳蹤何處所滿林香霧夜冥

冥斷句如淡煙三畝竹斜日一村鴉山雲秋帶雨海月  
夜生潮桃花山路分諸澗楊柳人家聚一村俱佳

王曉菴

震澤王曉菴處士錫聞學究天人尤以濂洛關閩爲已  
任崇禎甲申之變欲死者再父母強持之乃止遂閉戶  
不出窮約終身嘗賦絕糧詩云盡道寒灰不更然閉關  
豈復望人憐平時空慕榮公樂此後方知漂母賢何必  
殘形仍苟活但傷絕學已無傳存亡不用占天意矢志  
安貧久更堅與吳江潘次耕太史未交甚篤嘗遺潘書

論史學云世稱良史三家司馬氏陳氏歐陽氏龍門進  
呂雉於本紀而孝惠兩少帝不序于宏尙著其名前少  
帝且逸之陳壽帝魏退蜀名吳寇忠武而賊壯繆永叔  
於亂臣賊子一切帝制子之名號稍正者悉被貶黜于  
古謂之良史良史矣紫陽綱目俗尙薄之下至季漢書  
宋史新編誰復罹齒故知良不良在乎幸不幸不在義  
之正不正事之核不核也持論精覈最爲潘所服膺云

一綫天題辭

西湖飛來峯下一綫天巖洞幽深爲避暑勝境關雲巖

侍郎題辭刊石云龍洞竊篠驚峯嶙峋岩松偃蓋澗草  
敷茵六月無暑四時有春聽泉品石養性怡神字作八  
分體秀潤可愛

道情

徐靈胎徵君穎悟絕人游庠後厭薄時藝歲試題詩卷  
後徐郎不是池中物肯共凡鱗逐隊游因是見黜以布  
衣終其身於學無所不通尤精醫術名重一時好作道  
情一切詩文皆以是代之自謂構此頗不易必情境音  
詞處處動人方有道氣著有洄溪道情行世錄二首於

左勸孝歌云五倫中孝最先兩箇爹娘又是殘年便百  
順千依也容易周旋爲甚不好好的隨他願譬如你詐  
人的財物到來生也要做猪變犬你想身從何來即使  
捐生報答也只當欠債還錢那裏有動不動將他變面  
你道他作事糊塗說話畝偏要曉得老年人的性情倒  
像了箇嬰年定然是顛顛倒倒倒倒顛顛想當初你也  
將哭作笑將笑作哭做爹娘的爲甚不把你輕拋輕賤  
也只爲愛極生憐到今朝換你箇千埋百怨想到其間  
便鐵石肝腸怕你不心同意轉邱園樂云做閑人身最

安無辱無榮無惱無煩朝來不怕晨雞喚直睡到紅日  
三竿起來時籬邊草要芟花邊土要翻香蔬鮮果尋常  
饌只聽得流水潺潺鳥語關關頑兒癡女跟隨慣綠蓑  
青笠隨時扮也有幾箇好相知常來看看掛一幅輕帆  
直到我堂灣帶幾句沒要緊的閒談細細扳買碎魚一  
碗挑野菜幾般煖出三壺白酒喫到夜靜更闌

場屋中忌諱字

場屋中用忌諱字往往被黜嘉慶丁丑孔梧鄉學博卷  
已入額旋因詩中聖化二字見擯以死亦言化也嘉善

陸孝廉浚工制藝道光癸巳春闈首藝識者決其必售  
陸亦自謂文可奪命矣榜發竟被放比閱落卷則主司  
已填中式名次復塗去以次藝用鶩崩二字也捧卷大  
哭目盡腫尋得病卒於都中丙申 殿試何子貞太史  
卷已列進呈十卷之首旋以大行二字爲閱卷大臣某  
公指出改置二甲第八名應制詩賦尤宜莊重袁簡齋  
太史已未朝考詩題因風想玉珂以聲疑來禁苑人似  
隔天河一聯幾被斥賴尹文端公力爭始獲雋家鯁漠  
姪辛巳秋試三藝俱爲主司所賞以詩有嫦娥如許近



句見撰又汪龍莊大令乾隆乙未科會試中式第三大  
總裁稽文恭公以鐙右觀書詩中用重瞳字史記不專  
指舜不便進呈移改四十六名可見衡鑒者抉擇精嚴  
卽應用字面亦當審慎也

土物

杭州省會百貨所聚其餘各郡邑所出則湖之絲嘉之  
絹紹之茶酒甯之海錯處之薨嚴之漆衢之橘溫之漆  
器金之酒皆以地得名惟吾台少所出然近海海物尙  
多錯聚乃不能以一最佳者擅名此明王恒叔士性廣

志繹之言也自今觀之如杭之茶藕粉紡綢紙扇剪刀  
湖之筆縐紗嘉之銅爐金之火腿台之金橘鯊魚亦皆  
擅土宜之勝而爲四方之所珍者

兩世秋元

道光丙午科浙江解元嘉興張慶榮乃嘉慶戊午解元  
張廷濟之子猶及身親見之六十七名歸安鄭訓成曾  
舉丁酉己亥甲辰三次副車年甫二十五時人爲之語  
曰四科鄉薦咸推鄭兩世秋元豔說張

竹夫人

保抱攜持朕不忘五夜之寵輾轉反側爾尙形四方之  
風宋李公甫所作竹夫人封詞也工妙鮮匹朱熹香同  
年又仿毛穎革華之例作倚玉山房夫人鮑璵璫傳有  
云夫人撰有抱青集子夜歌云感郎綢繆意許儂情久  
長郎意雖云熱儂心祇自涼肯以雨露濃而忘抱冰雪  
郎自竭郎歡儂自盡儂節蘭蕙有幽馨桃李多豔姿阿  
儂無他好虛心足郎師寓意深婉得風人旨

像

張華博物志黃帝登仙其臣左徹者削木象黃帝帥諸

侯以朝之後世祀鬼神用像蓋昉於此

西征日記

吾里孔雅六學博憲采績學能文尤敦品誼嘗游秦中  
歷主古華文昌岷陽書院講席訓迪諄諄士心悅服以  
文就質者甚衆坐是得眩症遂歸撰西征日記備載游  
蹟有云蘭州北門外橋名鎮遠以船爲之橫排二十四  
隻自南岸達北岸每船相離等丈船填土石頭尾用大  
鐵索囊砢石沈河底復用大鐵鍊連貫之鍊環大如盤  
余兩手不能舉一環不知幾何重也兩岸均有鐵柱插

沙土中大合抱出地約丈餘相傳爲明初所鑄船面鋪大木板數層以草土填平沿河聯以紅欄凡往來甘涼口外者悉由此橋車馬日以千計諺所謂天下黃河一道橋是也冬河冰合制府率僚屬祭河神始拆船橋車馬皆行冰上正二月閒冰泮仍駕以橋冰橋之最可危者在將泮未泮時兩岸冰已有罅漏車馬仍往來如織旁觀爲之寒心習慣者自若也雅六有渡冰橋不果詩云腳踏黃河冰魂飛白塔山

黃河對岸山

山峭險而峻冰薄

危乎艱往來車馬馳閒關已溺猶將凋朱顏如何以身

臨深淵父母髮膚同一斑不如仍上望河樓頭去崑崙

星宿影落杯酒閒

望河樓在南岸  
今爲皇華館

### 恩科

本朝待士極優凡有

覃恩必有鄉會恩科

萬壽恩科則始於康熙五十二年歲在癸巳時士子以  
上六十萬壽請開恩科事下禮部咸以舊創所無難之  
大學士王公揆時爲尙書獨口以

萬年之

聖主當六旬之大慶此豈有成例可援若以靡費爲嫌則民間家長生日子孫僮僕尙不惜出所有招集賓客矧富有四海而區區計及於此遂如所請以上立命舉行自後乾隆嘉慶道光皆踵行

盛典

皇太后萬壽亦皆有恩科而道光三十年開正科十恩科五其計十有五科

恩澤之源

文治之隆亙古未有也

袁隨園

袁隨園詩名重一時近則譽爲佻薄者多且詆其晚年放蕩之失平心而論其爲宰時清勤明決無愧循吏嘗言爲守令者當嚴束家奴吏役使官民無壅隔則百弊自除其爲政終日坐堂皇任吏民白事有小訟獄立判遣無稽留者多設耳目方略集鄉保詢盜賊及諸惡少姓名出所簿記相質證使不能隱則榜其姓名許三年無犯漏雪之奸民皆斂迹又其生平事母孝友於姊弟篤於故舊嘗爲亡友沈凡民司祭掃三十年如一日程



編修晉芳死負五千金往弔焚其券且撫立其孤喜汲  
引後進成就者衆蓋其經濟行誼皆可師法惜爲才名  
所掩也

### 志學箴

楊至堂河督與林文忠公同官有年文忠以學有經法  
通知時務行無瑕尤直到古人書贈楹帖河督因作志  
學箴以發明其意云士希賢日尙志惇五典敬五事先  
植基經與史漢唐宋漢學精於訓詁唐學詳於疏證宋學深於義理學無異非  
唐則典章制度無存故注疏爲尚非程朱則風俗凡七  
人心莫挽故踐履爲先其於學之實事求是一也

略原其始若九能餘技耳思濟人務求已依於仁壽命  
久久古讀若已詩施邱久與以韻六月久與喜韻蓼莪  
久與耻韻○漢鏡銘長保二親利孫子作吏高官壽  
命久吾友高伯平之子行信以說文字作篆刊之附跋謂  
論學大公息羣儒之聚訟良然

### 麗辭

趙清獻詩有春窗惱春思一枕杜鵑啼之句司馬溫公  
詞有相見爭如不見有情還似無情之句范文正詞有  
眉間心上無計相迴避之句韓魏公詞有愁無際武陵  
凝睇人遠波空翠之句林和靖詞有羅帶同心結未成

之句後學每以之藉口競作麗辭不知惟立品如數公  
乃可偶一爲之若後生小子沾沾焉於此求工鮮不爲  
心術之累

高文端公

滿洲高文端公晉由監生授泗水令洊歷府道至兩江  
總督晉文華殿大學士仍留兩江總督之任未嘗一  
日立於朝

特恩殊遇近世罕有其比

婦人悼亡詩

悼亡詩多名作而婦人悼亡詩絕少吾邑孔瑤圃女史

沈青齋觀

詩云廿回蔗境亦何曾卅八年光感廢興七

品頭銜添白髮一編手澤其青燈醫從隔歲來無益命

入殘冬續未能風雨南窗思往事偷生此際獨沾膺語

獨沈摯又嘉興戴蘭英女史詩云一曲離鸞唱夕暉輕

塵短夢萬緣非可憐稚子情癡甚猶著麻衣待父歸亦

悽婉動人

### 油汙衣方

油汙衣麪塗法最佳用生麥粉入冷水調勻厚塗汙處

越宿乾透以百沸熱湯和皂角洗之油化無迹

### 朱相國

高安朱相國軾九歲時父攜至巨室某氏某見其文秀  
問讀書否對曰五經甫讀畢學作破題時方築室因以  
鋸木爲題公應聲曰送往迎來其所厚者薄矣某大奇  
之攜之登樓以小子登樓令對公應聲曰大人不問某  
知爲偉器令在家熟肄業以女妻之

### 勞孝廉

勞孝廉文元杭州人工制藝有聲嘉慶己巳會試首題

君子喻於義一節文有云小人之喻足以盡天下之利天下之利不足以盡小人之喻識者謂得喻字之髓榜發不售旋以病卒士論惜之

岳忠武于忠肅

文人立論往往好逞偏見如魏叔子謂岳忠武不當班師侯朝宗謂于忠肅不諫易儲非社稷臣皆拂乎理之正仁和應潛齋徵君撝謙云恢復者一時之功也受命班師萬世君臣之正也武穆之全者大矣終宋之世將無一人跋扈者誰之力也坤六三含章可貞或從王事

无成有終武穆之无成乃所以有終也此論出而忠武之心白矣袁隨園云大臣者以安社稷爲容悅者也彼正統者得罪於社稷人民譬如吏棄城將棄軍遺敵之擒而僥倖返國幸矣復欲償其官蔭其子孫此何理也夫忠肅固社稷臣也但願其君有治世之大功不願其君有謙讓之小節就使博一諫名未必遽干主怒而不出此者其所見者大而用心純故也此論出而忠肅之心白矣

眉生姪詩

眉生姪秉樞幼穎悟八歲學爲文落筆雋敏異於常見  
道光癸巳游庠年甫十三旋於丁未入詞林乙巳春闈  
後留寓京邸嘗賦都門秋思詩爲諸名宿所稱茲摘錄  
其二首云人海茫茫自溯洄遺愁聊復一樽開孤吟欲  
與秋聲敵百感都隨月影來未了名心休作達慣經離  
恨轉生才頻年書劍飄零極不信黃金舊有臺 麝煤  
燒盡雁書沈迴首鄉園思不禁雲裏關山孤客夢月中  
砧杵萬家心主偏耐冷憐秋菊倦卽知還愧暮禽檢點  
寒衣更惆悵緇塵痕比去年深又高唐州詩云滿院



香閣夜分離人到曉不曾聞夢魂先要尋家去那有閒情管雨雲語亦清俊

### 給燭

殿試不給燭歲試科試亦然制科雜錄云康熙己未試博學鴻詞晚出者十餘人皆給燭竣事洵爲破格掄才道光間濱州杜石樵侍郎甥督學浙江士子亦得給燭吾鄉某生能文章而構思甚遲作字又拙歷試以不完卷被黜年四十餘猶困童子試比公按試某日晚僅錄首藝公命給燭完卷俾游於庠逾年遂登賢書公之待

士寬仁類如此宜其躬膺多福後起熾昌也

徐觀察

婁縣徐玉崖觀察長發備兵蜀中建昌接僚屬之暇輒與諸生講學民安之忘其爲長吏達官年七十乞歸賦詩留別有句云風雨將闌防失足溪山大好要回頭語意深切可爲戀棧者指引迷津

錦囊集

武康徐雪廬孝廉熊飛采輯當代雜流詩爲錦囊集二卷頗多佳句節錄以廣其傳秀水錢梅號玉崖賣肉韭

溪橋下以好詩貧其家乃肩二竹筐置蔬首羊胃雞跖  
鴨脯于中售諸市以自給筐下詩幅鱗次遇小異流俗  
者輒出以贈之登凌秋閣云江涵斜日千砧急人倚西  
風一劍寒金陵懷古云天際楸梧留二寢雲間宮殿失  
千官 嘉興郁心哉字秋堂寓乍浦以沾菽乳爲生業  
自稱粗糲腐儒和王墨莊移居詩云占斷清陰數畝賒  
水村茅屋作煙霞先生不種門前柳漁父空尋渡口花  
春暖聞鶯初轉藥月中放鶴自煎茶世人那得知名姓  
此是方壺隱士家 海鹽張炎字淡玉嘗賣餅平湖之

清溪日屑爐金行吟村落閒得句就村夫子索筆硯書  
之餅爲兒童攘竊一空弗顧也咏白菊句云老圃月三  
徑曉霜秋一籬爲時所稱 南雁張宏字野樓少工詩  
以嗜酒致貧困頓不能自給辱身爲門隸循牆覓句終  
日不休春日吳門道中云渡江三日雨寒食一村花登  
閘港橋云風濶片帆來極浦天空一雁度斜陽 華亭  
朱鐸字愚谷獨卒之子嘗於鄰館見綱目殘本讀而悅  
之因蓄錢購書苦不能多見人輒問家有書乎乞借讀  
後得高青邱詩大悅之朝夕諷誦下筆輒似青邱後以

父老更役爲獄卒閱十年院司讞獄偕衆獄卒至蘇州  
及期當歸謂衆曰我爲獄卒以養父也今父死我何獄  
卒爲然不可以是辭於官因循至今公等自去我不歸  
矣遂赴水死聞者莫不悲之怨歌云昨夜春風來庭前  
弄顏色不用下珠簾是儂舊相識焚香云焚香小閣前  
幽緒忽悽然親老愁更役詩多那換錢風花判落溷山  
豆莫成田坐憶當年事生涯亦可憐 甘泉湯振宗字  
繡谷貢才不遇嘗依人紀綱鹽筴往來豫章荆楚閒苦  
吟不輟蒼唐淡村云風雨空庭花落後江湖秋水雁來

初卽事云華髮無情催客老青山不語看人忙 平湖  
陳文藻字愚泉以薙髮爲業年未及冠卽工五七言後  
爲童子師專意吟咏所詣益進游僧院云看花香引路  
坐石蘚侵衣郊行云漁艇迎涼依柳泊村雞報午隔花  
啼秋日同人村店小飲云負山茅屋松成徑臨水漁莊  
竹擁門 錢塘阮松字秋山業薙髮所居與余慈柏學  
博爲鄰學博擅墨梅阮得其指授閒作小詩亦清妙有  
神韻雨夜懷友云聽到更殘倍寂寥西風送雨轉蕭蕭  
空山一夜泉流急人隔前村舊板橋

難經經釋

徐靈胎難經經釋辨正誤謬有功醫學其釋分寸爲尺  
分寸爲寸云關上分去一寸則餘者爲尺關下分去一  
尺則餘者爲寸詮解明晰可謂要言不煩

董枯匏

秀水董枯匏茂才耀京其父石農山人家法書畫皆秀  
逸詩品冲淡似韋蘇州句如浮雲拂澄宇白日下危檐  
雲淨淡溪色松高落翠陰又咏閩蘭不開花云孤芳不  
媚世空谷甘寂寞移種庭階前幽懷欣有託真意不在

花勿厭得氣薄不見木槿花朝開暮還落浮榮亦何爲  
吾將藏吾樸寄託高曠卽此可見

任子不齊

秀水盛泰川大令百二任城書院學海樓釋奠先賢任  
子記謂任氏譜載任子少孔子六歲楚以上卿禮聘不  
就有詩傳禮緯考及逸語三篇其弟子有東門子高蒯  
伯儀皆他書所無當表出之

晉唐文章

歐陽公云晉無文章惟陶淵明歸去來辭坡公云唐無



文章惟昌黎送李愿歸盤谷序蓋取其意識高卓合於  
樂天知命之旨耳若論文章此豈足以盡之至於宋之  
文章苟持此意衡之其惟坡公之赤壁賦乎

聰訓齋語

桐城張文端公英聰訓齋語有云讀書者不賤守田者  
不饑積德者不傾擇交者不敗四語可括諸家訓辭千  
萬言

陶宏景

陶宏景受知於齊帝迨梁武兵至新林遣弟子戴猛之

假道奉表及聞議禪代又援引圖讖數處皆成梁字合  
弟子進之夫既自號隱居何乃與人家國事且忘齊帝  
知遇之隆而干寵新朝待膺恩禮以是遠擬巢由得無  
有餘忤耶

除夜詩

文衡山甫田集除夕詩至多其中寅除夕雜書絕句情  
味最勝千門萬戶易桃符東舍西鄰送歷書二十五年  
如水去人生消得幾番除多事關心偶不眠隨人也當  
守殘年不須更說新春事來歲今宵在日前人家除夕

正忙時我自挑燈揀舊詩莫笑書生太迂濶一年功課  
是文詞小童篝火潔門閭爲說新年忌掃除卻有窮愁  
與多病無因歲晚一般驅遙夜遲遲燭有花家人歡笑  
說年華人生勿苦求身外常得團圓有幾家

五律句用仄聲

五律無一句全用平聲者一句全用仄聲如孟浩然送  
友東歸起云士有不得志栖栖吳楚閒杜少陵蕃劍起  
云致此自僻遠又非珠玉裝齊已早梅起云萬木凍欲  
折孤根煖獨回皆是此類尙多

王微之

困學紀聞王微之云觀書每得一義如得一真珠船見陸農師詩注陳耀文正楊以爲王微之胡燝拾遺錄以爲元微之按陸農師佃和孫勉教授詩仲舒玉杯足瑕類中散珠船不光彩自注云中散謂王微之則陳胡之說皆誤

黃綰

明史黃綰爲紹興知府以寬大爲治因覈陳洸獄爲張璉桂萼等所誣被徵士民哭震野爭致贖綰止取二錢

漢劉太守寵後此可媲美

桑水部詩

桑歿甫水部詠古詩時出新義王文成公祠云千載武  
宗輝廟號多緣新建大功成于忠肅公墓云黃屋何緣  
重入塞可憐只論奪門功皆可作史評

張浚

楊誠齋謂張魏公有社稷大功五建復辟之勲一也發  
儲嗣之議二也誅范瑄以正朝綱三也用吳玠以保全  
蜀四也卻劉麟以定江左五也然其功固大其過亦甚

多前人警之者衆矣青浦王蘭泉司寇昶論尤明暢大  
旨謂宋南渡之時天下形勢尙可爲高宗以軍國重事  
付浚而乃剛愎自用致四十萬人坐喪於婁宿之手四  
方震動兵氣沮喪宋之不亡不獨諸將力戰之功亦天  
幸耳且浚而以恢復中原爲已任則曷爲効李綱濟趙  
鼎宋室中衰小人盤互僅僅一二賢臣而復出死力以  
傾軋之專權固位桀驁自雄其心尤有不可問者他如  
王庶小將也信之而殺曲端酈瓊劇盜也在之而拒岳  
飛邵宏淵驕卒也護之而敗李顯忠好惡拂人故三督

師而敗劔良臣絕迹於內良將離心於外士卒糜爛於疆場宋之天下有可爲而卒至於不可爲皆浚有以致之愚以爲其材甚庸其識甚闇其量甚狹其自用也甚專宋儒以南軒故交相推重不敢作一指摘語最可異者至以諸葛武侯比之或嘉其不主和議彼韓侂冑曷嘗不伐金也司寇之言如此余又考諸宋史如張守與浚力爭不當罷劉光世兵柄呂祉不可合撫淮西浚不從仇念說浚以精兵自壽陽漢上徑趨舊京浚不能用汪伯彥旣貶浚與秦檜援郊祀恩起伯彥知宜州浚嘗

薦秦檜可任大事富平之役楊晟吳玠力言勿輕進郭  
浩言當分守其地犄角相援俟釁而動浚皆不聽又以  
督府乏用議加征於民又不救陳東歐陽澈死且奏胡  
瑄筆削東書欲使布衣挾進退大臣之權幾至召亂將  
瑄追勒編置蓋其生平瑕類未可縷數矣

仞

仞字解包咸七尺趙岐八尺王肅四尺應劭五尺六寸

朱子注論語從包注孟子

從趙程氏竊用謂度應以尋爲八尺  
度深曰仞必七尺是則包說爲長矣

市



市南方曰市北方曰集蜀中曰疾粵中曰墟滇中曰衙  
子黔中曰場

邱大理

淮安山陽邱侍講象升官大理寺左寺副時吳三桂倡  
亂軍民爲所惑逃人五十率衆悔悟來歸刑部以叛逆  
論事下三法司邱引律文逃叛自首及能還歸減罪二  
等爭之曰百姓脅從者不少若絕其歸命之誠祇益堅  
其爲賊耳衆聽其言遂駁正上報可旗人有與父異居  
而後母與鄰人私者父憤不能制語子曰兒爲我殺之

子夜殺後母及鄰人於室自歸有司有司論極刑部院  
覈擬如所論邱持不可曰春秋書夫人孫於齊不稱姜  
氏絕不爲親禮也夫絕不爲親卽凡人耳彼承父治命  
手刃父讐而以大逆論無乃非春秋之義乎乃以兩議  
上

詔特從末減其半反大獄類如此

詠菊

先君子最愛種菊每至秋日繁花滿庭時招同人宴賞  
嘗賦詩以寄興云叢叢秋色映煙蘿老圃霜飛未改柯

氣可凌寒無礙瘦品能耐久不嫌多一庭清影超塵垢  
三徑幽香伴嘯歌好約前溪素心侶東籬晨夕試相過

鄭中丞詩

鄭夢白中丞小谷口詩鈔調秀詞雅卓然可傳行閒感  
興云半杯入手其誰論寸管從教堂北門東海羽書馳  
赤緊西興鐘鼓斷黃昏驚沙雁影寒雲渡小隊鴉兵細  
柳屯懷絕曹娥江上思九旬慈母九重恩津門新樂  
府云堆鹽坨鹽後船頭擊鼓聲琅琅大包捆載來蘆場  
萬夫連臂如雁行一堆兩堆作山立千堆萬堆苦未息

赤足踏沙白於雪海門落日寒無衣得錢且免全家饑  
東門換米西門歸道逢主翁不相識衰奴夜擁飛輿出  
紅燈高宴梨園客十字圖

思水利也

忠毅疏潞客談冀北何

地無江南咿咿啞啞水車動綠楊委地春髻髻長官一  
片心農夫千日力碁盤盡出十重圍白沙化作黃金色  
斥鹵可耕渠可通古今農事將毋同吁嗟乎落落海濱  
地茫茫古人意居民懶畚鍤競逐魚鹽利豐碑下馬拜  
賢王苔痕綠上斜陽字斷句如長城驛云晝本夕陽人  
影淡碁盤亂石馬蹄斜新綠云含笑眉痕初嫁女稱心

袍影乍官身歌風臺云貧賤人情邱嫂谷艱危世味太  
公藥青山鎮云分水入江湖尾大背山成屋市腰長皆  
刻意新警不落恆蹊

韓文公闢佛

韓文公闢佛而詩集中多贈僧之作後人疑之余觀其  
送惠師云吾非西方教憐子狂且醉吾嫉惰游者憐子  
愚且諄去矣各異趣何爲浪霑巾送僧澄觀云浮屠西  
來何施爲擾擾四海爭奔馳構樓架閣切星漢誇雄圖  
麗止者誰送靈師云佛法入中國爾來六百年齊民巡

賦役高士著幽禪官吏不知制紛紜聽其然皆語含規  
諷與闢佛之旨未嘗相悖至與大顛三書則爲後人譌  
託可無疑也

嵇叔夜

竹林七賢惟嵇叔夜不得其死余按晉書稱康恬靜寡  
慾含垢匿瑕寬簡有大量而竟橫罹酷刑則以不禮鍾  
會遂爲所譖嗟乎士君子處世何可以貧賤驕人而不  
恪循禮節哉

芭蕉樹

王漁洋居易錄云邊司徒華泉詩自聞秋雨聲不種芭蕉樹或議之謂芭蕉不得稱樹因引花間詞笑指芭蕉林裏住以爲既可稱林顧不得稱樹耶余按芭蕉樹見於維摩詰經又謝皋羽逃暑崇法寺詩云棋局雨生苔鮮文袈裟晴挂芭蕉樹同已先言之矣

泉甘而酒冽

泊宅編謂歐陽公作醉翁亭記後四十五年東坡大書重刻改泉冽而酒甘作泉甘而酒冽王漁洋以爲實勝原句今按集中作泉香而酒冽香字不如甘字爲佳

陳士奇

陳士奇駐兵重慶爲張獻忠所執大罵而死可謂死得其所當士奇督學政時好與諸生談兵及秉節鉞反以文墨爲事軍政廢弛石砮女將秦良玉圖全蜀形勢請益兵分守十三隘扼賊奔突置不問蜀以是擾然則蜀之罹禍士奇不得辭其責幸以死報國不至蒙詆於後世耳

鄧侯

漢蕭何封鄧侯後漢鄧禹城宮亦封鄧侯皆屬南陽郡



音于盱切禹更封梁侯定封高密侯宮初封成安侯更封期思侯又更封鄧侯定封朗陵侯獨何未嘗更封且世承鄧封至王莽敗始絕高后時何子祿薨無嗣廼封何夫人同爲鄧侯婦人封侯前此罕見

### 作文增益

作文固無取冗長然用字有以增益而愈佳者如歐陽公作畫錦堂記云仕宦至將相富貴歸故鄉此人情之所榮今昔之所同也後增二字作仕宦而至將相富貴而歸故鄉乃覺更勝又作史炤峴山亭記云元凱銘功

於二石一置茲山一投漢水章子厚謂宜改作一置茲  
山之上一投漢水之淵方爲中節公喜而用之黃山谷  
題仁宗飛白書跋末云譽天地之高厚贊日月之光華  
臣知其不能也集中作臣自知其不能也增自字語意  
乃足於此知作文之法不得概以簡削爲高

### 殉葬

秦穆公殉葬百七十七人三良之賢而亦與焉康公陷  
父於不義乃知魏顆陳尊已其賢洵不可及後世殉葬  
之俗猶未盡革至明英宗遺詔始命不得以宮妃殉葬

此真能恤人命而祛敝習者

朱侍郎詩

海鹽朱虹舫侍郎方增愛才若命寒賤之士尤加意拂拭士論翕然歸之道光甲申八月考試翰詹詩題昨夜庭前葉有聲

上特賞其詩二三四六聯

硃筆加圈拔置一等第一遂由翰林院侍讀學士陞內閣學士詩云西風昨夜吹庭館忽聽窗前颯颯音落葉滿階驚曉夢涼聲一徑動秋心夕陽古渡仍紅樹斜月

疎簾尙綠陰此日籬邊聞語啾舊時枝上憶棲禽幽懷  
偶觸高樓笛清韻還添小院砧瘦碧半叢餘弱草濃青  
十里減平林相思烟柳紫遙浦又見霜楓染遠岑獨有  
蒼松留勁節曾霑雨露九重深

採芳集

平湖錢孝廉步曾刻其五世祖起隆制藝一卷名採芳  
集皆摘四書中艷麗字句遊戲成文嘻笑怒罵無所不  
有如妲一字題文云宿瘤也以爲仙姬姣倂也以爲嬌  
客在媒或以衆見其聞尙存廉耻而妲乃備極其形容

優隸也以爲俊秀貧實也以爲豪華在媒早以微言溫  
語任意相欺而妁乃更從而點綴又云本以婦人輕信  
之耳妁復鼓彼如簧遂使母氏專權父雖欲禁之而不  
得本以深閨獨處之嬌妁竟誘諸覲而遂使高堂未許  
女先遙慕之而如迷妁之巧者意僅切於肥囊妁之拙  
者幻亦生於閱歷倚以彼列諸冠蓋卽是蘇張游說之  
儔妁之老者口舌旣堪惑女妁之少者容貌并可悅男  
故以彼略試逢迎遂諧秦晉婚姻之好描寫若輩情狀  
如鑄鼎象形又妻婢纏題云竊慨今天下之多不廉大

抵皆其妻爲之也其母題云且天下容有不愛親之子  
斷無不愛子之親一妾題云且三代以上多丈夫三代  
以下多妾婦上競諧媚而妾在朝下盡逢迎而妾在野  
持論奇快皆可作當頭棒喝

### 三元

趙雲松觀察贈三元錢湘船閣學詩云累朝如君十一  
箇事蹟半在青史留蓋指唐張又新崔元翰宋孫何王  
曾宋庠楊寘馮京王巖叟金孟宗獻元王宗哲明商輅  
也張又新孫何王曾宋庠楊寘馮京王巖叟商輅史皆

有傳王曾宋庠商輅爲名宰相馮京爲名執政若張又  
新之諂附敗名王宗哲之降賊偷生適爲科名之玷耳  
按遼史王棠傳鄉貢禮部廷試皆第一是亦三元也趙  
詩不之及何耶

本朝三元長洲錢棨

乾隆己亥解元辛丑會狀官至內閣學士

臨桂陳繼昌

嘉慶癸酉解元庚辰會狀官至江蘇布政使

皆克敦行誼無愧名臣

### 蜜丁馬甲

嘉慶丁卯科浙江鄉試詩題挂席拾海月紹興呂學博  
承恩詩云蜜丁曾某品馬甲亦同名爲主司賞識取中

三十四名按蜜丁見海物異名記云蜜丁魁蛤之子也  
李時珍本草綱目謂卽瓦屋子又名蚶馬甲見韓昌黎  
詩云章舉馬甲柱關以怪自呈洪氏注云卽今江瑤柱  
周必大亦有詩云珠剖蚌胎那畏鵲柱呈馬甲更名珧  
呂詩未見佳殆取其運典新僻耳

七上黃鶴樓散人

湖北黃鶴樓踞山面江爲登臨勝境道光丙申冬余宦  
游武昌曾登七次窮攬景物作口號云半年家寄武昌  
郡七度身登黃鶴樓領取江天無盡景平生奇絕是茲



游迄今人事遷流勝游難再因作七上黃鶴樓散人圖  
章以誌當時吟躅云

良心官

秀水朱梓廬休度官山西廣靈知縣慈惠誠信人不忍  
欺蒞任七年休養生息民日遷善百姓皆呼爲良心官

自鋤明月種梅花

自鋤明月種梅花句複見最多宋劉翰種梅詩云惆悵  
後庭風味薄自鋤明月種梅花趙復自遣詩云老去空  
山秋寂寞自鋤明月種梅花元薩天錫詩云今日歸來

如昨夢自鋤明月種梅花明卓敬詩云雪冷江深無夢  
到自鋤明月種梅花

朱文正公詩

嘉慶初和坤伏誅

御製詩頒示臣工朱文正公和句有云寄語普天諸父  
老共驩曾亦事陶唐措語得體爲一時和章之冠

兄弟同登科

兄弟同登科世所常有而咸豐辛亥 恩科浙闈兄弟  
中式者獨多秀水陳丙曾陳謤曾平湖方釗方鈞歸安

張興義張興詩瑞安黃體立黃體芳皆同父也秀水陳  
合儀陳合瑜則同祖也而餘杭褚維璠中式二與其子  
成績中式二連名其徒仁和金繩武亦同榜獲雋褚是歲在  
金氏課讀尤爲科場佳話

### 孔太恭人

嘉興朱九山觀察其鎮之母孔太恭人昭慈幼嫻文翰  
書法亦工年十三父筮陔明經廣南客游山左中秋玩  
月賦詩云今夜團樂月清光萬里同恐添慈母思不敢  
說山東一時皆稱異之觀察書法秀勁負盛名於時蓋

得於母教者多觀察授館職後由京寄書稟請迎養作  
三絕句示之有瞻雲且緩思親念好把文章皆  
聖朝及暇日鳳池須記取舊汀鷗鷺莫相忘之句

譚滌生詩

杭州譚滌生茂才廷獻幼有神童之稱詩不作庸以後  
語所著化書堂初集佳什綦多節錄四首寓言云顧免  
豈長圓滄桑幾更變人生不稱意坐覺微軀賤山榛陁  
有蒼美人如可見義和鞭日車欲去不得戀盛年惜早  
衰清鏡悲顏面望遠生古心涕淚如流鞍行路難云讀

書盡萬卷頗識忠孝字學道行十年與君斟酌仁與義  
人生百年不爲少追逐衣食非我事行路難聲莫悲今  
日是昨日非攜手出門望白日惟見浮雲東西南北飛  
遺興云江鄉聊寄跡流水繞書堂深竹有人語野花隨  
徑香相期與農圃招手話耕桑習靜空山裏閒中日月  
長送袁黎谷歸新城云予已不得意子今行路難江湖  
尊酒別風雨柁樓寒士信無長策貧尤戀故歡蘼蕪山  
下是欲采路漫漫

黃韻珊詞

海鹽黃韻珊孝廉憲清才調獨儼著有茂陵絃帝女花  
淩波影等院本爲時所稱小詞亦工浪淘沙一闋尤饒  
情韻云秋意入芭蕉不雨瀟瀟四庭如此好涼宵月白  
纏綿花自媚人自無聊別恨幾時銷認取紅綃鳳箏  
音苦鴈書遙醒著欲眠眠著醒燈也心焦

垂訓樸語

吾邑陳太華學博其德明季有道之士著垂訓樸語遺  
後有云省閒言語以補誦習則拙者敏省閒心思以繹  
義理則愚者通獨立於萬物之上乃爲有志能屈於萬

物之下乃爲有養人非聖人不能無過過而能改仍是  
好人故以過告我者愛我之甚也以過責我則我之師  
也若以過容我諒我則彼爲君子而我不適成爲小人  
乎吾人居心常以好事望人常以好意度人縱使百受  
人欺不失爲忠厚君子又惜陰說云凡人縱以百年爲  
期十歲以前尙屬童蒙五十以後又屬衰耗止有四十  
年可用精力而夜復當其半歲時伏臘冠婚喪祭諸務  
大略又費十年以此思之眞所謂一刻千金語意警迫  
學者皆當書之座隅

卓倚兀

卓子倚子兀子皆無木字司馬溫公書儀可證今書作  
桌椅杌流俗之誤也

先生

經書先生之稱名義各別論語先生饋謂父兄也見其  
與先生竝行也謂成人也孟子待先生如此其忠且敬  
也謂師也先生將何之謂學士年長者也儀禮上相見  
禮若先生異爵者謂致仕者也今人稱師曰先生而凡  
當尊稱之者亦曰先生蓋其所由來遠矣



來歙傳

後漢書來歙傳父仲娶光武祖姑而隗囂將王遵乃以  
歙爲光武之外兄且歙之孫稜尙光武子顯宗女稜之  
孫定尙顯宗曾孫安帝妹稽其世次證以外兄之稱則  
仲當是娶光武之姑耳祖字疑衍文

終篇用也字

困學紀聞云歐陽公記醉翁亭用也字荆公誌葛源亦  
終篇用也字蓋本於易之雜卦韓文公銘張徹亦然余  
謂終篇用也字始於爾雅釋詁釋言釋訓三篇凡用也

字六百九詩牆有茨君子偕老篇亦然荀子榮辱篇孫  
武兵法行軍篇論語孟子亦有此體公羊穀梁二傳尤  
多唐宋以還韓文公祭潮州大湖神文柳仲塗李守節  
誌蘇東坡酒經陳止齋戒河豚賦江浮溪胡霖誌銘皆  
仿其體爲後世所傳元姚燧仰儀銘終篇用也字四十  
一乃四言體又格之變者矣

貪生倖福

唐太宗宣宗武宗皆以餌丹石殞身憲宗懿宗皆迎佛  
骨後卽殂庸闇者無足怪英哲者亦然則害於貪生倖

福之私也

呂氏春秋

呂氏春秋湯欲令伊尹往視曠夏恐其不信湯由親自射伊尹此以詭譎之術誣聖也又謂孔子道彌子瑕見釐夫人此以比黨之說誣聖也當日懸千金而人無能增損高氏誘謂非不能也蓋憚相國畏其勢耳良然

王穀賸

蕭山王穀賸大令宗炎學問淹博性尤恬退家有中人產僅足溫飽既通籍遂杜門不出築十萬卷樓以文史

自娛子端履入詞林卽貽之書曰我已知足汝當知止  
毋戀浮名而失真樂也因亦乞病歸大令著有晚聞居  
士集嘗謂宋藝祖以受禪開基通鑑自不得以魏爲纂  
高宗以宗枝再造綱目自不得以蜀爲僞讀書論世其  
說至精又自題竹圃圖詩云百尺樓邊半畝園梅花結  
子竹生孫此中合與幽人住香到芹泥綠到門五十年  
來鬢已絲天街塵染碧衫緇頭銜寫入農書裏不枉人  
稱老畫師可以想見其風趣

陳樸堂詩

嘉善陳樸堂上舍世鈐幕游粵東判牘之暇不廢吟詠  
有感懷詩句云家難識路何須夢詩易窮人不敢工頗  
爲時流所稱

徐敬齋明經

同里徐敬齋明經斐然歸安籍博通羣書探研不倦尤  
好爲古文之學自唐宋以迄

國朝採輯諸家辨其源流擷其精粹彙編成書其論唐  
文云唐人無韻之文率不可讀昌黎突然起八代之衰  
柳州起而與之敵古文一道華路藍縷之功以二公爲

首習之之精醇可之之警拔收之之倜儻表聖之安詳  
襲美之縱恣魯望之簡古其嗣音也顧宣公之沁人肺  
腑衛公之絕塵而奔於韓柳雖非同調亦斷不可混爰  
彙選而論定之他若漫郎之辟瀟異常獨孤之菁華未  
備張文昌流傳甚少皇甫七客氣未除以及劉賓客白  
香山李玉溪羅昭諫諸人各有所長均非正軌概從舍  
旃其論宋文云自韓柳闢古文之一途至北宋而極盛  
蓋宋初尙沿唐季之習柳開鄭條穆修張景之徒挽之  
而不足歐公得昌黎文於破麓中登高而呼學者響應

曾王三蘇輔而翼之徂徠涑水河南盱江二劉三孔潤  
色其間秦黃晁張后山方叔之流克承其緒於是北宋  
之古文冠絕古今嗚呼觀止矣南宋之文導源北宋顧  
扶疎勁健則有之而微傷於剽而不留和平醇正則有  
之而究病其直而少致然粹然無疵文與理兼到者朱  
子而外實繁有徒亦學者所當從事也文鑑止於北宋  
兩宋合選寥寥罕覩而宋人文集搜採兩難南宋集尤  
少卽藏書之家亦未數數見數十年以來北轍南轅風  
檣篷底有所見卽借鈔或錄草稿以歸自辛酉迄壬辰

首尾三十有二年得文一千七百六十七首釐爲十有六本顏曰宋文偶見極知不全不備掛漏良多然後之君子欲遴選兩宋文者其或將有取於斯今其書皆散佚無存惟所刊

國朝二十四家文鈔及今文偶見行於世

顧媚柳是

龔鼎孳娶顧媚錢謙益娶柳是皆名妓也龔以兵科給事中降闖賊授僞直指使每謂人曰我原欲死奈小妾不肯何小妾者卽顧媚也見馮見龍紳志略顧蒼河東



君傳謂乙酉五月之變君勸錢死錢謝不能戊子五月  
錢死後君自經死然則顧不及柳遠矣

蘇昀公撰聯

蕭山繆磐谷上舍安邦慕游臨海有姊卒於家而甥已  
遠出七年不通音問其友代作輓聯不當意質之先君  
子乃爲題云七載思兒望斷雙魚空墮淚三秋夢豎影  
拋隻鴈最傷心繆爲歎絕又仙居王某治痘有名其戚  
撰聯贈之屢改未就先君子援筆書云身居仙境成丹  
易手補天功保亦多一時咸歎爲工切

歷代甲子紀元表

仁和董杏騰明經醇博通羣籍嘗以六十甲子爲格取  
史鑑所載歷代正閏紀元年號按格分注以便考索名  
曰歷代甲子紀元表第一甲子爲黃帝元年第十一甲  
子爲夏少康自有仍奔虞之年第二十一甲子爲商祖  
辛十祀第三十一甲子爲周孝王十三年第四十一甲  
子爲周赧王十八年第五十一甲子爲晉惠帝改元永  
安之年第六十一甲子爲唐昭宗改元天祐之年第七  
十一甲子爲明孝宗宏治十七年明經生於第七十六

甲子之年正月書成通常五十初度乃咸豐三年癸丑也

靜宜女史詩

鯤溟姪之繼室靜宜女史陳葆貞嘉善陳樸堂上舍世  
鈐之女稟承家學雅擅清才著有綺餘書室詩稿如秋  
夜對月有懷外子云孤月上林端秋光滿畫欄遙憐今  
夜客不向故鄉看虛幌誰同倚征衫淚未乾男兒四方  
志所歎爲饑寒豈有封侯願空教別故鄉料應思骨肉  
誰與話溫涼懷城三年刺人添兩鬢霜上堂親已老何

日理歸航聞粵中有警寄外云落拓江湖客行藏不自  
由那堪羈旅日重抱亂離憂處賤無奇策依人豈善謀  
歸期應早定江上理扁舟百越愁回首高堂有老親頻  
年無信息此日又烽塵長是傷離別何由其苦辛願隨  
飛雁去重作嶺南人王昭君云紫塞長門一樣悲何心  
終老向宮帷不如絕域和親去還得君王斬畫師楊太  
真云一死能教國難平馬前值得早捐生紅顏若向昇  
平老未必君王不負盟保陽寓中作寄外云紛紛塵事  
擾居諸誰識清閒福有餘儂不鳴機君謝客且來同讀

古人書品誼文章泣鬼神世閒如干台長貧請看乘傳  
成邨客何似臯家廡下人石門方幼櫟參軍廷璐稱爲  
洗盡鉛華得正聲非虛譽也

甲癸議

烏程嚴鐵橋學博可均才高學富脾睨羣流某進士來  
見叩以漢書事未盡了了則曰君僅知時文耳吾失言  
矣其玩世傲物類如此嘗搜輯唐以前文爲全上古三  
代秦漢三國六朝文七百四十六卷手自繕寫歷二十  
七年而後成以無資未得付梓著有鐵橋漫稿十三卷

詩如虛窗三面水老樹半邊春一路聽流水前村多落花峭帆追日去驚浪蹴山回潮生滄海白日落大江黃皆得唐人三昧嚴爲建德教諭時義烏有高木生某爲忌者所誣見棄於其父事聞之官大吏欲爲超度萬難措辭嚴聞之乃爲甲癸議一篇致其房師閻撫韓芸舫克均督部見之大稱賞據其說入爰書事賴以解其辭備載稿中大略謂甲在外二十八年擁高資歸而其妻先死其子乙年二十六旣舉秀才儀表出羣丙與乙素有隙丁睨甲貲黨丙而擠乙稱乙姦生于甲耻之逐乙

而事聞令長令長以律無文不能決上之大吏大吏入  
奏下百官博議癸議曰竊謂乙事尋常耳可以片言昭  
雪人妊十月九月而生者常也妊七月而生生而壽考  
者世閒多有俗說妊八月而生難育蓋不確闕澤在母  
胞八月叱聲震外見會稽先賢傳其不及七月者黃牛  
羌種妊六月生見魏略其逾十月者荀氏孕十二月生  
苻堅呼延氏十三月生劉淵張夫人十五月生劉聰見  
晉書載記慶都孕十四月生堯見帝王世紀鈞弋夫人  
懷昭帝十四月乃生見漢書附寶孕二十月生黃帝見

搜神記陽翟有婦人妊身三十月乃生子見嵩高山記  
太康溫磐母懷身三年然後生見異苑長人國妊六年  
乃生生而白首見外國圖大人國其民孕三十六年而  
生見括地圖老子託於李母胞中七十二年見瀨鄉  
記老子母懷之七十歲乃生生而白首見神仙傳載籍  
極博妊逾十月者悉數難終甲在外二十八年而歸而  
乙年二十六蓋其妊二年無足爲異宜片語昭雪丙丁  
宜不論大吏曰癸議以謂妊二年允哉據以覆奏於是  
甲乙復爲父子如常余按元史黃潛傳云母童氏夢大



星墜於懷乃有妖厯二十四月始生潛此尤近而可徵者

孔宥函司馬

曲阜孔宥函司馬同年繼鏐詩才超俊深以學力氣韻直逼古人詩稿盈尺刊未及半錄其最著者高郵湖作洪湖抱天影炯爲智者憂萬古波濤居一線隄防留大官日召令買石窮山邱以石抗蛟怒築堰如長蚪下堰楚州腳上堰淮山阪汨汨水衡錢化爲蜃與鮑久客熟湖水嗚咽胸中流寄山陽潘四農師用陶詩擬古韻澤

國累年饑大官無歲荒小吏朝暮謁上堂復下堂戟門  
列風旆鼓角吹蒼茫紆酒客在閣涕泗農在場一隄障  
龍蛇城郭參邱邱度支竭租賦水與金低昂老兵抱歛  
臥腹飽防河方久客傍淮甸閉戶空嗟傷揚州雜詩廿  
載邗江路行吟動值秋客懷看月減往夢與雲浮野竹  
山光寺清風文選樓旅遊復何事飄泊問沙鷗藏川雨  
無補聰明百不能常情曉岸月詩境雪山僧零落川光  
改羈棲夜氣增又停江上棹來對驛樓燈皆卓然可傳  
宥函於咸豐四年秋來游武林徧探西湖諸勝屢過余

齋嘗卽席賦詩相贈云東山游釣暮雲邊經典傳家媿  
汝賢莫歎無衣聊卒歲其憐有母傍餘年荒衙鮭菜新  
醺醪上國鶯花舊管絃廿載夢回江岸曉鷗波萬里接  
烽烟所作楹聯亦挺拔可誦題錢武肅王祠云吳越之  
閒至今樂土漢唐以後無此賢王輓涇縣包慎伯明府  
世臣云衰白際時艱孤恨荒愁蹈東海而死文章憎命  
達片言隻字與北斗長垂

三石公聯

從姊純葆伯父三石公之長女適同里歸安丁學博仁

咸賢明淑慎三黨交稱其歿也年僅中壽石公哭以  
聯云墮地而半齡失恃提攜保抱端賴重闈想當年教  
養恩深倚泉下相逢應亦怪爾來太早宜家而衆口稱  
賢黽勉勤劬克襄內政悲此日死生路隔縱命中有定  
獨何如我老難堪

壽序

壽文始見明陶學士安集至歸震川而益多方望溪作  
壽序有云以文爲壽明之人始有之然其知體要者尙  
能擇其人之可而不妄爲而壽其親者亦必擇其人之

可而後往來今之人則不然其所求必時之顯人而其  
文則庸之村師幕賓無擇也其所稱則男女之美行皆  
備而不可缺一焉而族姻子姓之瑣瑣者竝著於篇其  
言可謂切中然非特壽序若是卽祭文墓誌等亦然卽  
此可見世俗之陋鮮不慕勢利而喜夸大也

### 犬門

官府案牘有更易一字而輕重懸殊者吏胥每藉是以  
舞弊惟通州胡大宗伯長齡之封翁嘗改一字救人之  
生可以爲法封翁嘗爲州吏承行盜案犯供糾衆自大

門入已定讞矣翁知衆犯因貧苦偶作竊非真巨盜言於官曰此到案而卽承認盜情必非久慣爲盜者今首從皆斬似失入矣官以上司催迫不及更繕招冊爲辭翁請於大字添一點爲自犬門入且言某仰體公好生之心竝無私弊官悟而從之一舉筆閒而拯十餘人之命宜其食報於後按五代史張居翰改詔書一行爲一家免蜀降人千餘其事亦有足稱

### 家傳單方

單方之神驗者可爲世寶余家傳有數方屢試屢效濟

人多矣恐久而失傳持誌之刀傷用草葉末糝之

端午夏至

日各采等分晒乾俟霜降日磨末

受溼氣爛腿用松香不拘數釜中用

水慢火煮以焚一炷香爲度取出松香

取出松香人冷水中方能凝結

否則膠滯

換水再煮如此換八次水煮八炷香時候松香之

毒始盡研極細末入猪油搗爛調勻用隔紙膏攤之其

法以長薄油紙摺成兩方塊一面鑿滿鍼孔一面攤藥

將兩面合攤藥摺在裏面以鑿鍼一面向患處貼上線

圍扎之勿著水有脂流出自愈

隔紙膏式

圖半紙鑿孔滿鍼孔

半紙攤藥

一切瘡用檳榔木繫子穿山甲血餘雄黃硃砂黑

砒大風子肉各二錢五分研極細末入土硫黃七兩五錢煮烱爲錠菜油磨搽日三次牙縫出血名牙紅用元明粉研細末糝之一切無名腫毒用鮮桑枝火熬向患處薰之小兒頭爛名染癩頭用銅青一錢瀝青一錢松香一錢蓖麻子肉四錢同搗爛以布一方如染癩頭大攤藥包患處跌打損傷用冬瓜子炒研細末溫酒沖服三錢日二次

江忠烈公

江忠烈公忠源字岷樵湖南寶慶人山拔貢舉於鄉爲



學官道光二十八年新甯逆匪寇寶慶公與弟忠濟忠  
濟忠淑集族人團練鄉勇屢挫寇鋒事聞擢知縣賞戴  
藍翎發浙江試用權知秀水縣事時浙西大水公請帑  
十萬撫卹上官從其請明年補麗水以父憂歸相國賽  
尙阿經略廣西招之隸烏都統幕旋以勞陞同知募鄉  
人千餘日訓練之寶慶民善鬪公又善撫之故所至破  
賊楚勇之名聞天下賊竄長沙屢追殲之由知府擢道  
員賞花翎湖南效用寇退而土賊四起瀏陽遵義堂爲  
百餘年盜藪聚黨萬餘人公整楚勇剿殺賊五千餘獲

大礮百餘火藥無算復剿湖北諸土賊戮首至二萬餘人升按察使奉

諭赴江南大營會江西圍急率楚勇赴之與賊日夜鏖戰賊用地雷破城公自缺處出奮擊先後斬馘二千餘城旋修固賊復穿地道六公率勇自城內迎掘破之自五月十八日被圍至八月二十三日賊始乘風遁去城幾陷而獲安公之力爲多

詔賜二品頂帶復臬司任未幾皖城告急

詔命巡撫安徽時舊治已爲賊據改省治廬州公至居

民大半逃散方訓練撫輯而賊率萬衆來攻外援不至  
十二月十六夜賊乘大霧縋城且發地雷四更城破公  
力戰受重傷弁某強挽公下城以轡進公嚼其指乃釋  
手公遂投水西門塘死年四十有四秀水莊芝階舍人  
仲芳紀公事甚詳今節錄之如此譚滌生茂才輓公詩  
有云悲涼許國身奔走亦以疲枝挂閤數旬飲泣人登  
陴雖緩雀鼠掘誰爲膏油遺追遙七千人犄角空相持  
軍門大星隕山崩走熊羆皆紀實之辭也

大錢

咸豐甲寅年以軍興費繁始鑄咸豐重寶當十大錢重  
四錢四分凡百錢用通寶八十重寶二浙江於八月廿  
二日頒行設大美官錢局主其事考重寶錢文始於唐  
乾元嗣後南漢劉龔乾亨閩王延政天德宋仁宗慶歷  
神宗熙甯徽宗崇甯理宗端平嘉熙遼穆宗應歷金章  
宗泰和皆有重寶錢歷代錢制有小錢而亦書重寶者  
唐乾元遼應歷是也大錢而不書重寶者如唐開元天  
佑宋大觀嘉泰嘉定淳祐明大中洪武天啟之類甚多  
然重寶之義似於大錢尤宜至歷代之當十錢如王莽

之么泉一十祇重七分三銖後周五行大布永通萬國  
唐乾元重寶開元通寶五代李璟永通泉寶王延義永  
隆通寶宋慶厯重寶熙寧重寶崇寧通寶大  
觀通寶金泰和重寶元大元通寶明大中通寶洪武通  
寶天啟通寶其製輕重不等最重者莫若洪武通寶錢  
當十者重一兩錢制之便民而通行最久者漢有五銖  
錢唐有開元通寶錢皆小錢也其行大錢而不能久者  
錢重則耗費繁而無濟於國錢輕則盜鑄多而有害於  
民今能酌輕重之宜而與時變通自可行之久遠也

姚梅伯詞

鎮海姚梅伯孝廉變生秉異資於學無所不窺尤精於  
倚聲著有疎影樓詞自題疎影調云天門海嶠倚綠梅  
擲笛清響如嘯夕隼雲盤秋鶴風嘶高寒或是同調江  
淹宋玉憑千古總一樣愁深歡眇儘半生鏘鏜蟬徽託  
與美人香草儂自狂歌自賞當前任贏得流俗評笑  
兩宋三唐換羽移宮落實詞仙多少江篷荻雨花簾月  
且暢寫隨時懷抱算拂牋香北茶南但欠紅兒嬌小此  
可想見其寄託矣

笙鶴樓

杭州吳山城隍廟後淳素房笙鶴樓俯瞰西湖境絕超  
曠明胡宗憲禦倭時曾於此籌議海防樓額爲董香光  
所題落成之日胡命酒讌賞海內文士與會者十七人  
各賦七言詩一章後燬於火志乘失載馬秋藥太常履  
泰獨悉其事因書額以復舊蹟道光乙未昭文蔣寶齡  
繪爲圖一時詞人賦詩紀之茲錄二首於左樓臺傳勝  
蹟笙鶴想遺音世事有興廢青山無古今尙餘秋藥叟  
能話老梅林舊地喜重築迢迢異代心

鄒鶴徵

笙鶴遺

遙賦遠游太常蝶去更難留神仙縹緲尋常事我欲榜

書壽海樓

戴熙

陳參議

錢塘陳午橋參議鴻官御史口稽查戶部銀庫屏絕苞苴終日危坐官人進茶湯皆謝絕之越十年庫吏侵蝕崇發刑部讞獄咸供惟陳御史任內無染無弊公論始出嘗建言輪班日講以爲康熙乾隆開設官使日稽進經史講義討論益精義理愈出辨別益確施措愈明兼可鑑別其才猷考驗其學識既備咨訪之具卽諸簡拔



之才識者稱爲千古名言

周遇吉

明史周遇吉傳載其守甯武城陷巷戰爲賊執大罵不屈縣之高竿叢射殺之自成集衆計曰甯武雖破吾將死傷多自此達京師歷大同陽和宣府居庸皆有重兵倘盡如甯武吾部下甯有子遺哉不如還秦休息圖後舉刻期將遁而大同總兵姜瓖降表至宣府總兵王承蔭表亦至遂決策長驅抵居庸太監杜之秩總兵唐通復開門延之京師遂不守賊每語人曰他鎮復有一周

總兵吾安得至此是遇吉之守甯武必不輕於一死故  
爲賊所憚如此乃榆次人王珪所作節錄補聞謂李自  
成急攻城語守陴以周遇吉獻否且屠遇吉聞之使人  
縋己城下見自成大罵竟爲賊磔殺胡天游石筍山房  
文轉信以爲實且斥正史陋妄而詆遇吉之死爲不合  
於義果爾則遇吉特棄城以畀賊賊亦何必刻期謀遁  
哉

赤水元珠

孫文垣赤水元珠闡發醫理有裨後學惟載製紅鉛之

法爲白圭之玷又推重石鍾乳以本草有久服延年益壽之說遂譏朱丹溪不可過服之言爲非不知本草稱延年之藥如蒲黃石龍芻雲母空青五石脂菖蒲澤瀉冬葵子等味未必皆可久服本草又稱水銀久服神仙不死而服之者鮮不受其害是豈可過泥其辭乎善乎繆氏仲淳之言曰自唐迄今因服石乳而發病者不可勝紀服之而獲效者當今十無二三經曰石藥之性悍真良言也尊生之士無惑方士有長年益壽之說而擅服之自取其咎也大抵服食之品宜取中和方免偏勝

之害

赤城雜詩

余自四十歲後不甚爲詩固由性懶亦以此道難精徒  
耗心神無益也在台州時詩興尙劇嘗賦赤城雜詩附  
錄八首就正大雅祖德清芬守一壇軒楹遺製尙依然  
登堂重認梁間字手澤存留六十年

秋畦公司錄臨海  
乾隆庚子歲修葺

學解梁間  
題字猶存

師門自昔受恩偏瞻拜空祠意愴然

沈鹿  
坪師

司鐸台郡最久台  
人士奉祀於祠

子舍遺書零落盡不堪回首十年前

廿年舊雨溯依依昔藉休嫌壯志違

孔梧鄉司訓臨  
海朝夕過從藉

破岑寂杯酒深談故鄉事便教沈醉亦忘歸半畝空園

護短牆春來消息問羣芳閉門漫道閒無事排日栽花

課正忙嚴親性嗜花栽植滿庭古垣槐影鬱蒼蒼金碧樓臺接

上方自問名心銷已盡漫勞仙枕夢黃梁八仙巖祀純陽真人香火

絕盛踏春山徑路天斜勝侶招邀羽士家西北高樓簾

盡捲夕陽影裏望桃花八仙巖在城西北隅春日遊人皆於此登樓觀桃花雙

幘峯前路乍分一聲樵唱隔林間秋陰夾徑鶴無語中

有幽人眠白雲石徑巉巖步履遲碧雲深處去尋詩

夕陰欲合山光暝猶爲泉聲住少時

小琅玕山館詩

嚴比玉太守詩因未見全集僅識數句於三卷中今刊此書甫竣適比玉長子伯牙大令錕歸自滇持其遺稿小琅玕山館詩十卷見示云於甲寅歲在黔付梓三十年前酬贈之作皆在集中回憶一堂聚處選韻聯吟曾幾何時而萬里招魂中年永訣亦可傷已展誦旣竟補錄十首於此相見坡云幽澗越嶺聽絕巘連雲度深谷開要塗峻坂障前路峯轉迷西東崖暗失晨暮怪石猛虎門細徑修蛇赴接武漸盤旋交臂各驚怖陰壑籠晴

氛曲阿積寒霧下學懼高趾沿壁阻濶步亭亭戀夕陽  
欣欣對嘉樹念舊覲面艱懷新賞心遇相見幾時歡出  
險猶踴願散賑行云校場千人萬人立但聞歡呼不開  
泣一人日給米一升行者日少居日增民兮免散亡民  
兮脫溝壑陳陳相因太倉粟安得盡以濟楚獨不言撫  
字言催科羽檄紛紛民奈何當官誰學監門鄭圃獻流  
民補荒政寄懷定圃云並世此良友斯文一作家步趨  
皆學問氣味近煙霞閉戶揮青鏤循陔補白華相思不  
相見明月幾回斜揚州贈三弟崑圃廷琬云東風催客

買蹄舟又向揚州作小留  
鰕菜五湖尋舊夢鶯花三月  
種新愁但容人海時相見  
何必家山定共游爲語看雲  
眠亦得詩成還送屋西頭  
尋芳湖上屢招邀強與離  
前慰寂寥徹夜笙歌聽北里  
隔簾花雨話南朝客中鄉  
淚隨春盡身外閒愁借酒消  
占得二分好明月阿戎真  
比阿龍超到家日作云迴棹  
重尋水一灣綠楊影裏叩  
柴關兩年足履江湖險萬里  
身從殿陛還宦味略嘗雲  
其淡行裝乍卸夢俱閒只愁  
一紙官書促容易歸山又  
出山九日同人羣屏山登高  
云年來我亦悵離家插到



茱萸感鬢華。萬里鄉心驚落日。一庭秋色在黃花。吟情  
未許催租減。帽影無妨帶醉斜。知是明年又何處。好留  
鴻爪印天涯。雨霽云殘日濃陰。也遠村寒波綠漲。舊沙  
痕。春風吹過廉纖雨。一路落花紅到門。杭州別竺雲云  
風月年年紀勝游。無端離思動殘秋。路迴日落人何處  
獨上西湖舊酒樓。板橋云曾向秦淮訪六朝。明漪瑟瑟  
柳條條。一官萬里行將盡。秋雨秋風又板橋。

冷廬雜識續編

桐鄉 陸以湑 敬爰

冷廬臆言

明以來重次千字文者多矣各競妍巧小道有可觀焉  
丙辰五月課孫誦習因續次成篇韻不協於譜字每更  
其義語或失之俚良由率爾寄興致違繩準亦以見才  
智疏淺遠遜昔人爲可慙也請作皆不避字蓋臨文不  
諱之義茲亦用其例授梓代錄幸 大雅君子正之

道光甲辰後歷五年

甲辰九月丁先府君薨時公憂自  
台州歸里閱五年己酉二月 吏

部選補杭州府時當夏暑武林服官學舍寥落幸離俗  
教授六月到任緣謹隨老母宅於斯焉仰止

孔聖德高極天俶垂箴猷日星並懸萬世師表法誠永  
傳殿宇靜邈傍侍諸賢丁祭鉅典引爲布筵慎治禮樂  
兩階位嚴湯浴馨潔施被衣冠俯額伏拜神壹躬端祿  
食空縻稱職最難恥貽誚譏何可卽安往者少歲弱賤  
寡能受業習勞束脩自行巾箱寓賞故稟必溫糠火夕  
照慮淡志眞疑義紛積口問耳聽頗亦領會屬思淵沈  
論宗嵇正詠慕阮精力薄軻政辨黜儀秦乃陟海岱

王辰

鄉薦是冬驅車移情登嶽浮河超崑陲涇摩碣輶載稽  
計借北行詩囊盈遵路縣齊因造

帝京近瞻輦轂宮陛連雲公孤卿尹列任非輕仕途取  
用青紫同榮矯首九霄功績莫建辭尊居卑姑適我願  
丙申釋褐以知縣卽用分發湖北丁酉夏呈改教職僚  
友謂封疆大吏由縣令起家者多矣當以遠大自期余  
以才短杜門恬退困眠飢飯月陰滿身岫翠對面學解  
不願也近紫陽山峰巒延牆碑審別宋高宗石經今存八十六碑在  
互環映窗牖大成門外東西兩壁理宗賜國  
子監諸生碑亦在東壁又蘇文楹畫耽翫李龍眠畫至  
忠公表忠觀斷碣二皆墨寶也聖七十二賢  
像石碣在尊經閣下染筆命銘磨墨作讚元理抗晉隸字效漢涼

殢傾觴熱寐資扇短牋畏答異書默念經史子集廣助

聞見

石渠珍藏假讀罔厭

仁和陸掄珊光祺典守文瀾閣書時從借錄

招致舊雨

餘姚吳蓉峰麟書烏程鈕柜村福蘆近在咫尺同僚而兼舊識情好最治其餘二三素心時復過從談藝道古藉破

岑寂

嘯歌啓讌都籃特設垢累散遣主陪賓護杯酒競

勸鹹薑甘筍嘗新給膳形骸并忘釋帶去弁交歡北漆

要約指劒盤桓信宿翦燭達旦每恐辱罪敢務馳逐得

閒猶仙無譽是福起步亭臯絳亦悅目露圓浦珠沙素

聚玉枝葉環羅曰爲嘉木凌寒松多知

閨梧獨

池西梧樹辛亥

年手植今鬱然矣

枇杷飄丸妍荷張蓋覆李翳迴廊蘭鬱虛谷菜

根冬肥柰果秋熟奉杞收黍攝裳藝鞠手伐園條腸飫

渭竹歸禽房鳴潛魚池育市糟飽雞場薪牧犢西眺城

垣

學廨距湧金門甚近出城卽西湖

駕言出游伊誰云從雅人意投

逢

佳客偕游六橋三竺間留連忘返

談禪入廟坐釣臨流巖阿尋洞溪背

據樓郡縣遼曠足蹟幾周東南有美岡遙水長靈氣所

鍾華綵發煌璣寶映射律音宣章龍鱗振舉鵬鳳瓚翔

名通魏闕紙貴洛陽更劭篤寶本基勿荒盟心廉直守

體謙莊量似巨川操等澄霜規矩不虧祇承懼惶庶乎

獲祐推重四方相此烝黎皆存物則君父定分大常攸  
立夫也恭淑婦矢貞節昆弟棠茂士友芥合勉茲夙夜  
踐履敦敕若男終畝植稼營穡如女紡絲寸抽尺絜維  
彼庸愚善訓弗率姿性殊下內亡外的幹求金銀矜恃  
聲色富甚趙孟侈過號國統綺充床壁璇竟席驢駒騰  
驤羔雁結納戶壁深冥帷帳俠接晝聆優唱晚奏煩愁  
麗妾調笙寵御拱策巧語令容笑嚬動魄戚好惠疏嫡  
佐愛切封靡而家轉益賊刻鳥飛獸駭在田利執捕騾  
斬羊毛羽烹滅悲感驚號顧之傷惻竭欲疲殆處泰道

逆橫霸惡肆顛毀禍逼貌弊易丹髮凋催白曦朗豈再  
晦燁其炁邨土委化餘威頓寂殷鑒具邇省已宜密遐  
想皇初實始生民黃農宙遠墳索孰明奄及中古簡牒  
詳陳唐虞景運觀象察衡器使百工二八上陞禹稷庭  
堅左右秉鈞琴絃解阜鼓吹和平傅野呂磬英乂嗣興  
勒誅叛盜清制兵刑羣倫欣躍謂藉陶成克忠與孝敬  
叔陸兄兒蒙扶持感賴慈仁吉慶弔祀曲盡隱誠糧稅  
早貢康豫綏甯洪惟

盛朝



丙曜增暉漠戎悚謝塞羌說來州伯軍將府事堂哉纓  
組俊妙韓桐王槐草莽微臣匡濟匪才宰邑楚地旣徘徊  
且徊息機改圖養親良佳丙申在都早有改官之志捧檄需次知牧令洵不易爲任  
違其才必將隕越親意亦以改官爲宜歸志遂決續次干文以寫厥懷

### 重次千字文彙編跋

蕭子範胡致堂皆有千字文獨周興嗣本最著重次其  
字者明山陰徐文長渭仁和卓人月珂並稱於世惜未  
得見迨餘姚呂裁之章成叙明一代之事名曰野述辭  
極詳贍近世作者益衆若彭文勤公劉金門侍郎鳳誥

楊春圃學博世英作尤爲世所傳誦余友新城羅鏡泉  
學博以智搜集諸家厯三十餘年得二十一篇錄成一  
編將以付梓余於丙辰夏五嘗次其字作冷牖臆言今  
讀諸作彌愜宿好復次成篇以爲斯編之跋語愧未工  
廁前賢後恐不免貽誚續貂爾

惟周興嗣夙號多聞奉武帝敕次千字文廣列倫物富  
隸索墳頓凋元髮藉達赤心壹夕屬草終古垂名載筆

續爲渭與人月若呂章成寓指益密

呂章成野述首云  
大明洪武受命嗣

天末云臣呂章  
成拜手敬書

邇時巨手皆嘗陟厯上卿持衡庶官率

職黃甲充賓 丹陛傍宅

丙照光天

辰垣拱極皇哉燁曜

重華宣績

化駕夏商言法禹稷俯賴拜賁八音調律

康熙時王百

聖德頌千文首云奉

天承運

皇帝有真

尊榮安富文武聖神乾隆時彭文勤公

御製全

韻詩恭跋有云

丹筆露垂墨床星映平上去入

自初而竟

高宗純皇帝深賞之楊春圃

太上皇帝紀元周甲授受禮賦恭頌千文首云

聖人御宇甲子壹周福洪萬祀

業駕千秋中云丙辰上

日嘉慶元年

嗣皇御位

帝命沛宣

增歲

初登大寶祇受薪傳基承夙夜

繼照當天

縣息履祐交推嚴眺傳席孝答親暉九如欣慶百福洪

嘉帳俠羔燕殮佐爵杯琴劍戚會笙阮優徘徊劉金門侍郎阿雲巖

館師八表千文有云雲巖相公國之元老龍

龍首歲登朝最早再歷丙辰嘉慶建號荷甲周八年高

德劭末云竭微恭敬詠雅音長永增百祿願奉

千觴楊春圃有嚴慈八十雙壽徵詩啓千文縣邑遼

漠地承星宿市場據巖溪水環岫沙岡薪飄田路黍覆

阜翳枇柰莽有鳥獸祀釋廊深弔邨土舊丸墨勒圖豈

譏寡陋楊春圃武義縣志跋千文首云縣稱武義蓋自李唐近連金郡南達永常末云嘉慶甲子簡牒

初成誰陪執筆邑人世英回顧根本宗訓貽昆瞻祭廟貌感想儀刑

節守矢直量等涇澄愼辨嫡妾謙睦弟兄位連桓信寵

縻冠纓四知謹始松鬱桐榮

楊春圃楊氏譜跋千文末云綵牋詳也巾箱寶諸甲

辰閏月拜

手敬書 道寂端居首務勸學潛磨巾箱朗張盤燭帷

下寐忘竹素理熟每闕殆疑動虞禍辱遵五禮規輕萬

鍾祿已非盡改躬行最淑處約飢疲給糟止足賤彼曲

阿憚惶身束

王研雲寶仁勵學篇千文首云君臣既位覆載永平物號曰萬人得其靈致中作極

執壹惟誠末云顧筆懸箴對

紙勒策道光四年閏月五日少女必箴靜貞曠遠姑意

莫抗母猷實善隱並孟高容超號淡形骸委垢器宇恥

滿筵平坐莊床晦登晚裳領濟楚分別投翦取火傾湯

內助烹膳尺寸罔虧毀誚孰敢

魏古愚標有女訓千文

似茲佳藝

斬新設色妍逼綺統寶過璣璧池荷露浴階鞠霜潔遐

方驚賞碣碑競刻

彭文勤公作往年曾見石刻

用稽往牒厥體攸殊

果能立誠甯慮其疏空虛施鑒圓妙藏珠氣凌岱嶽流  
沛川渠毛羽矯轉輻輳驅抽紙摩象不亦說乎伏念  
孔子德劭業建俶脩羣經煌映霄漢戶聆瑟歌庭誠墻  
面同堂敬侍實茂條散性得所近鈞克表見漆園肆論  
公羊定傳正則傷悲龍門史讚策資治安奏侈封禪都  
京典引靡弗愛玩魏晉受命奄起俊英操矜樂府植感  
洛神步兵詠懷令伯陳情陶耽尊酒嵇解養生飛觴歡

唱金谷蘭亭真機旣邈弊染更移目駭璇組耳煩絃絲  
絳紫累葉青翠橫枝黜浮制紛恃韓退之詩盛李唐姿  
巧接跡老杜精微白也仙逸書仰王維囊秉長古雞林  
譽騰驢背思結秦師何堅趙樓誰卽東野孤寒西崑工  
切自是以來閨運相尋幹迴昇弱永叔主盟辭歸淵美  
志造沈冥斯道再振語要常存雲蒸曦旦通書二銘餘  
馨布扇乃及於明

聖朝啓基威靈蓋世

梧宮恭默

槐殿臨御功并兩大海  
甫仁被左臯右伊陞庸特貴滅  
霸施政伐惡踐義洞寥盜捕城清賊去宰尹讓廉黎兒  
綏父塞外雁臣軍營魚麗異木戎納珍稼羌致嘯聚落  
魄州郡食惠夫杞服農婦紡獲利猶惻困顛舍糧薄稅  
棠陰犢眠菜畝禽飫秋暑穡盈冬涼薑具笄鹹芥肥丁  
男悅豫士當此日願適而康河懸在口楹讀飽腸勞且  
對壁游厭招房釣謝礪石飯稱籃糠駒恐催景鳳聽鳴  
陽談故鱗比鯢綵鵬翔仕途簡任弁銀帶玉驟躍輦馳  
攝衣陪轂匪曰熱中匡扶忠篤甘雨隨車罪叛誅逐民



請慈父國舉良牧鼓吹雅南和聲易俗笑我荒愚泰恬  
晝昃祇執短檠發蒙溫習因閒效顰才力幾竭甚慕諸  
家的射矩絜煩懼杳亡將收入集幸賴羅君從事獨賢  
早夜敦勉問察積年好友遙離欲合無緣遣使假求初  
勿畏難出牋寫竟可云鉅觀後有作者宜詳審焉